

2779. XIV, 2-6 — Posse tomada por D. Beatriz, duquesa de Sabóia, filha de el-rei D. Manuel, das terras de Monte Calerio com todos os seus castelos, rendas e direitos que lhe tinham sido dados por escritura, por seu marido, Carlos de Sabóia. Monte Calerio, 1521, Dezembro, 12. — *Pergaminho. Bom estado.*

In nomine Domini nostri Jhesu Christi amen anno ejusdem currenti millesimo quingentesimo vigesimo primo indicione nona et die Jovis duodecima mensis Decembris in Monte Calerio in Generali Consilio centum et

viginti quatuor capitum domorum comunis et hominum Montis Calerii ac credencia de mandato et auctoritate spectabilis domini Anthonini Fizoris honorandi castellani ejusdem loci pro illustrissima dominatione Sabaudie et ibidem presentis sono campane et voce preconia in palacio comunis ejusdem more solito congregato ubi affuerunt nobiles syndici consulesque et credendarii ejusdem comunitatis in numero sufficienti et ultra duas partes ipsum totum consilium et credenciam representantes se presentavit magnificus dominus Jaffredus Paserii ex collateralibus magnifici consilii residentis in hac parte commissarius Sabaudie ducalis constantibus litteris dominicalibus quarum tenor sequitur et est talis.

Karolus dux Sabaudie etc.^a *Spectabili* benedilecto fideli consilliaro nostro domino Jaffredo Paserii ex collateralibus consilii nobiscum residentis ad infrascripta per nos deputato salutem.

Informati de tenore instrumenti tractatus matrimonii per nos cum illustrissima sincere dilecta consorte nostra carissima Domna Beatrice de Portugalia celebrati ex cujus tenore licet possessio castrorum locorum et juriditionum cum eorum emolumentis que illustrissime bone memorie consanguinea nostra Domina Blanca a nobis et de dominio nostro pro ejus dotalicio dum viveret tenebat et possidebat eidem illustrissime consorti nostre pro status sue domus manutencione assignatorum non veniret remittenda nisi intra tres menses a die celebrationis nuptiarum inschandos.

Verumtamen ut manifeste deprehendant omnes quantum cupiamus contractum ipsum nedum observare et que nobis incumbunt ultro adimplere sed tempus predictum liberaliter anticipare. *Cum* pro nostra in serenissimum et invictissimum doninum Portugalie regem socerum nostrum colendissimum observantiam tum pro ea singulari benivolencia et dilectione qua ipsam illustrissimam consortem nostram suis qualitatibus et meritis exigentibus jure prosequimur vobis ex certa sciencia expresse comittimus et mandamus quatenus ad loca propterea opportuna personaliter accedendo eandem illustrissimam consortem nostram seu pro ea agente in possessionem realem actualem et corporalem dictorum castrorum locorum et juridicionum que prefata illustrissima Domina Blanca ut premititur tenebat et possidebat cum eorum proventibus et emolumentis bonis pertinentibus et appendentibus universis ponatis mittatis et inducatis positamque missam et inductam manuteneatis tueamini et deffendatis cum potestate officarios in dictis terris constituendi et deputandi constitutosque revocandi et alia faciendi que ad hoc necessaria fuerint et opportuna servata forma dicti tractatus subque modis formis reservacionibus et condicionibus in eodem descriptis. *Precipiendo* insuper et injungendo universis et singulis officariis et subditis dictorum locorum mediatis et immediatis eciam voce preconia locis et moribus talia fieri solitis sub pena indignacionis nostre pro quolibet. *Quibus* sic injungimus quod eidem illustrissime consorti nostre suisque officariis de cetero pareant obediant et assistant et de dictis proventibus redditibus et emolumentis indillate res-

pondeant prout eidem illustrissime quondam Domne Blanche et suis officialiis parere obedire et respondere solebant.

Quoniam sic fieri volumus et vobis penas et muletas imponendi mittigandi declarandi ac alia omnia in premissis et circa necessaria faciendi gerendi et exercendi vobis plenam presentibus impartimur potestatem vestrisque jussibus et mandatis circa hec fiendis pareri volumus et intendi cum et sine penis veluti nobis quibuscunque in contrarium allegantibus non obstantibus.

Datum Cargnani die quarta mensis Novembris millesimo quingentesimo vigesimo primo per dominum presentibus dominis reverendissimo Glaudio de Stomaco episcopo Bellicensi cancellario ordinis Gabriele de Laude cancellario Sabaudie Jacobo comite Mon... barone Miolaj ex militibus ordinis glaudio de Baley^e barone Sancti Germani Ludovico de Ca.^{no} Domino de Mussinens magno scutiffee scutifferie Bertolino de Monte.^{lo} Domino Fruzasci Rliport Vulliet.

Quiquidem magnificus dominus collateralis predictus volens mandata ducalia exequi vigore predictae sue comissionis ac in exequucionem tractatus matrimonii in predictis litteris comissionalibus mencionati posuit in possessionem realem actualem et corporalem hujus opidi Montis Calerii tanquam de terris et castris que alias tenebantur per illustrissimam nunc quondam Dominam Blancham de Monte Ferrato Sabaudie ducissam pro ejus donareo illustrissimam ac inclitissimam Dominam Beatricem de Portugallia Sabaudie ducissam in personam tamen spectabilis ac generosi in utroque jure licenciati Domini Alvarii Johannis procuratoris specialis ad hujusmodi possessionem aprehendendam et aprehensam retinendum (*sic*) a prelibata illustrissima Domina ducissa Sabaudie constituti constantibus litteris patentibus quarum tenor sequitur et est talis.

Beatrix de Portugallia ducissa Sabaudie etc^a.

Universis sit manifestum et cum placuerit illustrissimo et excellentissimo principi et Domino Karolo duci Sabaudie conthorali meo observantissimo possessionem castrorum locorum et juridicionum que illustrissima bone memorie Domina Blanche olim ducissa Sabaudie tenebat et possidebat cum eorum proventibus redditibus obvencionibus et emolumentis nobis pro status domus nostre substentacione assignatorum ex forma contractus nostri dotalls nobis remitti et assignari confisi itaque de probitate et experientia spectabilis Domini Alvarii Johannis utriusque juris licenciati et serenissimi domni et genitoris mei observandissimi domini Portugallie regis expeditoris ex nostra certa sciencia eundem dominum Alvarium Johannem presentem et acceptantem harum serie facimus constituimus et deputamus procuratorem nostrum specialem. *Ita* tamen quod specialitas generalitati non derroget nec e contra ad videlicet pro et nomine nostro aprehendendum et adipiscendum realem actualem et corporalem possessionem dictorum castrorum locorum juridicionum reddituum bonorum emolumentorum et pertinentium eorundem et aprehensam retinendum ac alia faciendum quae nos ipsi faceremus si presentes

adessemus sub tamen modis reservacionibus et formis in dicto dotali instrumento lacius descriptis.

Promittentes nos ducissa prefata gerenda per vos in premissis et circa perpetuo habere ratta gratta valida et firma et numquam contravenire cum et sub aliis promissionibus renunciacionibus et ceteris clausulis in talibus opportunis quas hic pro expressis haberi volumus et has in premissorum testimonium concedimus.

Datas Cargnani die undecima mensis Novembris millesimo quingentesimo vigesimo primo. Per Dominam. Duquesa. Vulliet.

Presentis et acceptantis nomine et ad opus prelibate domine ducisse per eandem illustrissimam dominam ducissam seu ab eadem deputandum a modo in anthea tenendum et possidendum sub modis tamen et formis lacius in predicto instrumento tractatus matrimonii expressis jubendo et precipiendo prefato domino castellano Montis Caleri ibidem ut supra presenti.

Quatenus hunc locum Montis Calerii ejus durante acensamento et officio nomine et ad opus prelibate domine ducisse teneat et possideat et de prexiis obvencionibus ac emolumentis predicti loci a modo in antea non habeat respondere nisi in manibus prelibate illustrissime domine ducisse seu ab ea deputandum.

Qui dominus castellanus paratum se obtulit quibuscumque mandatis ducalibus obedire et premissa omnia facere. *Intimavit* etiam et mandavit prefatus magnificus dominus collateralis et comissarius ducalis nobilibus Luquino Panicerie Bernardo Avareni sindicis et aliis credendariis et consiliariis ibidem ut supra congregatis et presentibus ac toti comunitati ejusdem loci Montis Calerii in eorundem sindicorum prenominatorum credendariorumque et consiliariorum personas.

Quatenus prelibate illustrissime domine ducisse ac suis officialibus a modo in anthea parere et obedire uti eorum domino de cetero debeant. *Quiquidem* nobilis Luquinus Paniceria consindicus nomine et vice dictorum considici credendariorum et consulum ac tocus consilii credencie et comunitatis Montis Calerii obtulit et seu obtulerunt sese paratos citra tamen prejudicium et derogacionem franquixiarum libertatum statutorum et capitulorum ejusdem loci Montis Calerii quibuscunque mandatis omnibus Sabaudie ducatibus ut decet semper obedire et premissa facere. *Sperantes* prelibatam illustrissimam dominam ducissam ipsas franquixias libertates statuta ac bonas consuetudines ejusdem loci eisdem comunitati et hominibus observaturam ac ipsam comunitatem et homines particulares in eorum agilibus comendatos semper habituram. *De* quibus omnibus premissis jusserunt michi notario et archarum comunitatis curieque ejusdem loci conscribere publico infrascripto tam prefatus dominus collateralis et comissarius ad opus prelibate illustrissime domine ducisse ac quorum intererit in futurum quam prefatus nobilis Luquinus nomine premissis fieri litteras testimoniales seu publicum instrumentum presentibus ibidem ad

omnia et singula premissa nobilibus Bonifacio Pisii et Raymondino Gay Burgensibus Montis Calerii testibus ad hoc vocatis et rogatis.

Et ego Bernardus Monibelli de Monte Calerio publicus imperiali et ducali Sabaudie auctoritatibus notarius Curieque et Archarum comunis ejusdem loci Montis Calerii conscriba ad premissa per prefatum magnificum dominum collateralem et comissarium ellectus et assumptus supra-scriptam missionem in possessionem cum omnibus et singulis supra-gestis recepi ac scripsi et in hanc publicam formam levavi solito signo proprio tabellionatus in premissorum fidem apposito.

A margem: (sinal do notário).

(A. R.)